

आकाशवाणी

खबरां

- 1- भारतीय मालवाहक पोत नंदा देवी 46 हजार मीट्रिक टन एलपीजी लेईए कतर सोयां होर्मुज जलडमरूमध्य दे रस्ते गुजरात दे वडीनार बंदरगाह पुज्जा।
- 2- सरकार नै लोकसभा च दस्सेआ जे पश्चिम एशिया च जारी संकट दे बावजूद देशै दी आर्थिक स्थिति मजबूत बनी दी ऐ।
- 3- लोकसभा नै विपक्ष दे 8 सांसदें दा निलंबन रद्द कीता।
- 4- राष्ट्रपति द्रौपदी मुर्मु होरें आक्खेआ जे पीएम पोषण शक्ति निर्माण दे तैहत बच्चें गी दिता जाने आहला सत्तदार खुराक मानव पूंजी च निवेश ऐ।
- 5- भारत नै अफगानिस्तान दे अस्पताल पर पाकिस्तान दे हवाई हमले दी निंदा कीती, हमले च 400 सोयां मते लोक मारे गए, इसी अफगानिस्तान दी संप्रभुता पर हमला ते क्षेत्रीय शांति ते स्थिरता पर खतरा दस्सेआ।



LPG Nanda Devi

भारतीय पोत नंदा देवी लगभग 46 हजार मीट्रिक टन एलपीजी लेईए गुजरात दे वडीनार बंदरगाह पर पुज्जी गेआ। एह पोत कतर सोयां रवाना होआ हा ते होर्मुज जल-डमरूमध्य हु'न्दे होई भारत पुज्जा। कल इक होर एल.पी.जी. वाहक पोत मुंद्रा बंदरगाह पुज्जा हा। दोनं खेपें सोयां देश दे गैस भंडार च बड़ा मता बादा होने दी मेद ऐ। अधिकारियें बरोसा दोआया ऐ जे गैस आपूर्ति च फिलहाल कोई कमी नेई ऐ। दीनदयाल बंदरगाह प्राधिकरण दे अध्यक्ष सुशील कुमार सिंह होरें अज्ज वडीनार च इक बड़्जे जहाज सोयां दूए जहाज च एलपीजी स्थानांतरण दी जानकारी दिती। श्री सिंह होरें दस्सेआ जे मुख पोत 'नंदा देवी' 46 हजार 500 टन एलपीजी लेईए आई चुके दा ऐ, जिसी लौहके जहाजें च स्थानांतरित करिए एनोर ते हल्दिया भेजा जाग।



LPG e KYC

सरकार नै साफ कीता ऐ जे एल पी जी आस्तै बायोमेट्रिक आधार प्रमाणीकरण -ई के वाई सी छडा उने ग्राहकें आस्तै जरुरी ऐ जिन्दा अजें तगर प्रमाणीकरण नेई होआ ऐ। पेट्रोलियम ते कुदरती गैस मंत्रालय नै सोशल मीडिया पोस्ट च आक्खेआ जे एह कोई नमा निर्देश नेई ऐ सगुआं एह सरकार दे उने जतने दा हिस्सा ऐजिन्दे तैहत मते थवा मते एल पी जी उपभोक्ताएं गी बायोमेट्रिक आधार प्रमाणीकरण पूरा करने आस्तै प्रोत्साहित कीता जा र दा ऐ। मंत्रालय नै आक्खेआ ऐ जे एह उने एल पी जी उपभोक्ताएं पर लागू हुन्दा ऐ जिनें अजे तगर ई-के.वाई.सी. नेई कराया ऐ। प्रधानमंत्री उज्ज्वला योजना दे जिने ग्राहकें पैहले ई-के.वाई.सी. कराई लैता ऐ, उ'नें गी इसी दोबारा कराने दी लोड नेई ऐ। प्रधानमंत्री उज्ज्वला योजना कन्नै जुडे दे लाभार्थियें गी इसी हर इक माली बरें च 7 रिफिल कराने दे बाद आठमी ते नौमी बुकिंग आस्तै छूट हासिल करने आस्तै छडा इक बारी कराना हुन्दा ऐ।



Goyal Ind Economic

उद्योग ते व्यौपार मंत्री पीयूष गोयल होरें आक्खेआ ऐ जे पश्चिम एशिया च जारी तनाव दे बावजूद, भारतीय अर्थव्यवस्था मजबूत स्थिति च ऐ। अज्ज लोकसभा च प्रश्नकाल दौरान जिमनी सोआलें दा परता दिन्दे होई श्री गोयल होरें आक्खेआ जे भारत दे कन्नै व्यापारिक संबंध मजबूत करने आस्तै दुनिया भरै च उत्साह बदा र दा ऐ। पूरी दुनिया च इक चालली कन्नै भारत दे कन्नै व्यापारिक संबंध बदाने दा अज्ज उत्साह ऐ। भारत आस्तै केई सारियां संभावना ना अंतरराष्ट्रीय व्यापार च भारत दा नमा ध्या लिखेआ जा'रदा ऐ। गोयल होरें आक्खेआ जे जिसलै मुक्त व्यापार समझौते लागू होई जाडन तां भारतीय निर्यातकें आस्तै व्यापक मौके पैदा होडन।



West Asia Escalation

पश्चिम एशिया च अज्ज इराक दी राजधानी बगदाद ते कतर दी राजधानी दोहा सनें केई होरने क्षेत्रे च हवाई हमले होए। इसदे करी क्षेत्र च तनाव होर बदी गया ऐ। बगदाद च, अमरीकी दूतावास पर ड्रोन ते रॉकेट हमले कीते गए। इराक दे अधिकारिये हमले गी रोकने दी सूचना दिती ऐ। अल-रशीद होटल पर भी ड्रोन हमला होआ, जिसलै कि अल-जादिरिया च इक होर हमले च चार लोके दे मारे जाने दी खबर ऐ। ईरान समर्थित कताएब हिजबुल्लाह दे इक कमांडर, अबू अली अल-अस्करी दी मौत दी खबरें मगरा तनाव होर बदी गया ऐ। इराक दे प्रधानमंत्री, मोहम्मद शिया अल-सुदानी होरें इने हमले दी निंदा करदे होई इनें गी आतंकवादी कारवाई करार दिता। साहडे संवाददाता नै दस्सेआ ऐ जे कतर नै ईरान सोयां 14 बैलिस्टिक मिसाइलें ते केई ड्रोन हमले कीते जाने दे मगरा दोहा दे ऊपर हवाई सुरक्षा प्रणाली गी सक्रिय करी दिता गया ऐ।

<><><><><><>

PM Fasal Bima

सरकार नै पारदर्शिता, जवाबदेही ते करसाने दे समे पर दावे दा भुगतान यकीनी करने आस्तै प्रधानमंत्री फसल बीमा योजना च संशोधन कीता ऐ। लोकसभा च जिमनी सोआले दे परते च कृषि ते करसान कल्याण मंत्री, शिवराज सिंह चौहान होरें आक्खेआ जे पैहले करसाने गी भुगतान हासिल करने आस्तै केई महीनें तकर इंतजार करना पौन्दा हा। उने आक्खेआ जे हुन जेकर बीमा कंपनियां 21 दिनें दे अन्दर दावे दा नबेडा करने च सफल नेई हुन्दियां तां उनें गी कृषि सरबन्धी दावे पर 12 प्रतिशत ब्याज सने भुगतान करना होगा। श्री चौहान होरें आक्खेआ जे जेकर राज्य सरकारां बी दावा प्रक्रिया च चिर करदियां न, ता उनें गी करसाने गी 12 प्रतिशत ब्याज देना होगा। उने आक्खेआ जे करसान, दावा निपटान कन्नै संबन्धित अपनी शिकायतें आस्तै कृषि रक्षक पोर्टल पर शिकायत दर्ज कराई सकदे न।

<><><><><><>

MPs Suspension Revoked

लोकसभा नै सदन च सर्वसम्मति कन्नै प्रस्ताव मंजूर कीते जाने मगरा अज्ज विपक्षी धडे दे 8 सांसदे दे निलंबन गी वापस लेई लैता ऐ। संसदीय मामले दे मंत्री किरन रिजिजू होरें एह प्रस्ताव पेश कीता हा जेहदे च सदस्ये दे निलंबन गी फौरी प्रभाव कन्नै खतम करने दी तजवीज कीती गई ही। रिजिजू होरें आक्खेआ

जिनें सांसदे गी मुआत्तल कीते गेदा हा, उन्दे च कांग्रेस दे Manickam Tagore, Amrinder Singh Raja Warring, Gurjeet Singh Aujla, Hibi Eden, Dean Kuriak ose, Prashant Padole ते Kiran Kumar Raddy सने CPI (M) दे S Venkateson शामिल ना बरोधी धडे दे इनें 8 सांसदे गी पिछले महीने दी 3 तरीक गी बजट सत्र दरान सदन च असभ्य बवहार आस्तै निलंबित करी दिता गेआ हा।

<><><><><><>

FM health

खजाना मंत्री निर्मला सीतारमण होरें आक्खेआ ऐ जे सेहत बीमा सरकार दी प्राथमिकता ऐ। सरकार बरे 2033 तक सारे गी बीमा कवरेज प्रदान करने दी दिशा च कम्म करा'रदी ऐ। राज्यसभा च प्रश्नकाल दौरान जवाब दिन्दे होई खजाना मंत्री होरें आक्खेआ जे इक व्यापक ग्रामीण पुज्ज योजना शुरू कीती गई ऐ जेदे तैहत देश भरै च 25 हजार ग्राम पंचायते गी सेहत बीमा दे दायरे च आनेआ जाग। श्रीमती सीतारमण होरें आक्खेआ जे भारतीय बीमा नियामक ते विकास प्राधिकरण- IRDAI नै 2024 च नियम अधिसूचित कीते हे।

<><><><><><>

PM Rahat Scheme

जम्मू-कश्मीर सरकार नै “पी.एम- राहत” स्कीम दी शुरुआत कीती ऐ तां जे सिडक हादसे च जखमी होने आहलें लोकें गी फौरी मैडिकल सहूलत हासिल होई सकै। इस स्कीम तैहत शिकार लोकें गी 140 तयशुदा अस्पतालें च शुरुआती किश घंटें च इक लख 50 ज्हार रपे तगर दा बिजन नकदी दे इलाज होग। एदे च हादसे दे मगरा आहले 7 दिन बी गिने जागंन। सेहत-पुलस ते जिला प्रशासन मिलियै बेहतर ढंगै सिर अमलावरी लेई कम्म करडन। लोकें गी अपील कीती गेई ऐ जे ओह सिडक हादसें दी रिपोर्ट फौरी करन। कोई बी मददगार जेडे कुसै हादसे च घाऽल लोकें दी मदद करदे न गी 25 ज्हार रपे ते प्रमाण-पत्र दिता जाग।

<><><><><><>

HM NCB

गृह मंत्री अमित शाह होरें नारकोटिक्स कंट्रोल ब्यूरो-एनसीबी दे स्थापना दिवस पर कर्मियें गी बधाई दिती ऐ। सोशल मीडिया पोस्ट च शाह होरें आक्खेआ जे एनसीबी अपनी जिम्मेदारी गी बखूबी निभा'रदी ऐ ते प्रधानमंत्री नरेन्द्र मोदी हुन्दे नशामुक्त भारत दे सुखने गी टकोदी गति कन्नै अगगे बदा'रदी ऐ। एनसीबी गी देशे दे युवाएं गी नशे सोयां बचाने आस्तै समर्पित इक प्रमुख एजेंसी दस्सेआ होई शाह होरें आक्खेआ जे राष्ट्र उन्दे समर्पण ते देशभक्ति गी सलाम करदा ऐ।

<><><><><><>

Prez PM POSHAN

नमी दिल्ली च अक्षय पात्र फाउंडेशन आस्सेआ आयोजित इक कार्यक्रम च राष्ट्रपति द्रौपदी मुर्मु होरें आक्खेआ जे सरकार आस्सेआ चलाई जार'दी प्रधानमंत्री पोषण शक्ति निर्माण – पीएम पोषण योजना तैहत बच्चें गी उपलब्ध कराया जाने आहली सत्तधार खुराक, देशे दी मानव पूंजी च इक महत्वपूर्ण निवेश ऐ। उमें आक्खेआ जे सरकार आस्सेआ पीएम पसंद शक्ति निर्माण दुनिया दा सब्बनें थवा बड्डा मिड डे मील प्रोग्राम चलाया जा र दा ऐ। ते सशक्त राष्ट्र दे निर्माण दी दिशा च अहू बडा गै महत्वपूर्णऐ। राष्ट्रपति मुर्मु होरें शिक्षा गी मानव जीवन च मौके पैदा करने दा इक महत्वपूर्ण साधन दस्सेआ।

<><><><><><>

Indian Embassy Doha

दोहा च भारतीय दूतावास नै जानकारी दिती ऐ जे कल कतर एअरवेज दे ज्हाजें राएं कोई इक ज्हार 100 भारतीय यात्री उत्थुआं नमी दिल्ली- मुम्बई कोच्ची ते होरनें भारतीय शैहरें लेई रवाना होए न। दूतावास नै सलाह जारी कीती ऐ जे इनें शैहरें लेई अज्ज बी ज्हाजें जाना ऐ ते 18 मार्च थमां एह ब्हाई सेवा कम्पनी यानि कतर एअरवेज अहमदाबाद- अमृतसर- बंगलुरु- चेन्नैई- दिल्ली- हैदराबाद- कोच्ची- कोजीकोडे ते मुम्बई लेई बी डोआरियां भरोग। ताजा जानकारी जां फ्लाइंट बुक कराने लेई यात्री कतर एअरवेज दी वेबसाईट जां ऐप पर जां कुसै ट्रैवल एजेंट कन्नै सम्पर्क करी सकदे न।

<><><><><><>

Jaishankar-EU Meet

विदेश मंत्री डाक्टर एस. जयशंकर होरें ब्रुसेल्स च यूरोपी संघ दे विदेश मंत्रियें कन्नै मलाटी कीती। उमें ईरान ते यूक्रेन दे संघर्ष गी लेइयै चर्चा कीती ते यूरोपी मुखें कन्नै भारत दे सरबंधें गी होर निगगर बनाने बारे गल्लबात बी कीती। डाक्टर जयशंकर यूरोपी संघ दे विदेशी मामले सरबंधि परिषद दी इक बैठका च हिस्सा लैने लई- यूरोपी संघ दे विदेश ते सुरक्षा नीति दे प्रमुख कजाकल्लास हुंदे सादे पर बेल्जियम दी राजधानी दे दंडु दिनें दे दौरै पर न। विदेशमंत्री होरें यूरोपी आयोग दी अध्यक्ष उर्सुला फॉन डेर लॉयन ते जर्मनी ग्रीस ते बेल्जियम दे विदेश मंत्रियें कन्नै बक्खरे-बक्खरें बैठकां बी कीतियां।

<><><><><><>

CM-LPG Review

मुख्यमंत्री उमर अब्दुल्ला होंरें श्रीनगर च इक उच्च सतह दी बैठक लाइयै रसोई गैस- पेट्रोल ते होर दुई चीजें-बस्तें दी स्थिति दा जायजै लैता। एह बैठक मध्य पूर्व च बने दे हालात दे मद्देनजर लाई गई। इस दौरान उनें ईद ते नराते सरबन्धी तयारियें दा बी जायजा लैता। मुख्यमंत्री होंरें डिप्टी कमीशनरें गी हिदायत दिती जे ओह जमाखोरी ते कालाबाजारी करने आहलें पर नेडमी तक्क रक्खन। उनें सूचना मैहकमे गी आखेआ जे ओह आम लोकें गी भंडार ते सप्लाई बारे समें- सिर जानकार बनांदे रहौन तांजे लोकें च डर-त्राह नेंई रवै ते अफवाह बी नेंई फैली सकै। इसै दौरान मंत्री सतीश शर्मा होंरें आखेया जे सरकार सप्लाई पर नेडमी तक्क रखा रदी ऐ ते नियमें दी खिलाफवर्जी करने आहलें पर सख्त कारवाई कीती जाग। उनें भरोसा दोआया जे जरुरी चीजेंबस्तें, पेट्रोल- डीजल ते रसोई गैस दी लोडचदी मात्रा च प्रदेश च उपलब्धता ऐ।

<><><><><><>

INDIA CONDEMNS PAK

भारत नै कल रात काबुल दे ओमिद नशा मुक्ति अस्पताल पर पाकिस्तान दे हवाई हमले दी साफ तौर पर निंदेआ कीती ऐ। विदेश मंत्रालय दे प्रवक्ता रणधीर जायसवाल होंरें इक बयान च आक्खेआ जे हिंसा दा एह कायरतापूर्ण ते अमानवीय कृत्य, कुसै बी चाल्ली कन्नै सैन्य कार्रवाई दे तौर पर सेई नेई ठहराया जाई सकदा। उने आक्खेआ जे पाकिस्तान, इस नरसंहार गी सैन्य अभियान दा ना देने दी कोशिश करा र दाऐ। उने आक्खेआ जे पाकिस्तान दी आक्रामकता, अफगानिस्तान दी संप्रभुता पर साफ हमला ऐ ते क्षेत्रीय शांति ते स्थिरता आस्तै सीधा खतरा ऐ। जायसवाल होंरें आक्खेआ जे एह हमला रमजान दे पवित्र महीने दौरान कीता गया, जेडा दुनिया भरै च मुस्लिम समुदाय आस्तै शांति, चिंतन ते दया दा समा हुन्दा ऐ। उने जोर दिता जे कोई भी धर्म या कोई भी कानून, कुसै अस्पताल ते मरीजें पर कीते गेदे हमले गी सेई नेई ठहराई सकदा। भारत नै अफगानिस्तान दी संप्रभुता ते क्षेत्रीय अखंडता प्रति अपने अटूट समर्थन गी दोहरादे होई हमले च मारे गेदे लोके दे परोआरें प्रति गहरी संवेदना व्यक्त जाहिर कीती। ते घायलें दे तौले नरोए होने दी कामना कीती ऐ।

<><><><><><>

INDIA CRITIZED PAK UN

भारत नै पाकिस्तान आस्सेआ अहमदियें पर रमजान दौरान कीते गेदे क्रूर दमन ते अफगानिस्तान पर हवाई बमबारी दी सखत लफजें च निनदेआ कीती। संयुक्त राष्ट्र महासभा च इस्लामोफोबिया विरोधी अंतर्राष्ट्रीय दिवस पर संयुक्त राष्ट्र च भारत दे स्थायी प्रतिनिधि पी हरीश होंरें आक्खेआ जे पाकिस्तान अपने गोआंड च इस्लाम विरोधी भावना यानी इस्लामोफोबिया दिया मनगढ़ंत कहानियां गढ़ने च बड़ा माहिर ऐ।

<><><><><><>

Pak-Afgan Clash

अफगानिस्तान दी राजधानी काबुल च कल रातींलै इक अस्पताल पर होए दे पाकिस्तानी ब्हाई हमलें च घट्ट कोला घट्ट 400 लोक मारे गे ते सैकड़ों घालऽ होई गे। तालिबान सरकार द प्रवक्ता ज़बिहुल्लाह मुजाहिद होंरें आखेआ ऐ जे पाकिस्तानी ब्हाई हमलें च अस्पताल दा इक बड्डा हिस्सा तबाह होई गेआ ऐ ते घायलें दी गिनतरी बद्धी सकदी ऐ। उनें आखेआ जे पाकिस्तानी फौजी शासन नै इक बारी फ्ही अफगानिस्तान दे ब्हाई क्षेत्र दा उल्लंघन कीता ते काबुल च इक नशा मुक्त अस्पताल गी निशाना बनाया- जेहदे चलदे अस्पताल च इलाज करा'रदे नशा पीड़ितें दी मौत होई गई ते नेकां घालऽ होई गे। एह हमला अफगान अधिकारियें आसेया दवें पक्खें दे बश्कार सांझा बन्ने पर गोलीबारी दी सूचना देने दे किश घंटे मगरा होआ।

<><><><><><>

Shab-e-Qadar

जम्मू-कश्मीर च शब-ए-कदर दी मुकद्दस रात गी पूरे धार्मिक जोश कन्नै मनाया गेआ। ज्हारां बदे अकीदतमंद पूरी रातीं चलने आहली नमाज, कुरान शरीफ दी तिलावत ते दुआएं च शामिल होने आस्तै मसीतें च पुज्जे। पूरे केंद्र शासित प्रदेश दे बक्ख-बक्ख जिले दी मसीतें दे दरगाहें च तरावीह दी नमाज, कुरान शरीफ दी तिलावत ते दुआएं च अज्ज बड्डलै फजर दी नमाज तगर इबादत च रूज्जे दे रेह। धार्मिक ओलमाएं मसीतें च लोकें गी इस रात दे महत्व बारै दस्सेआ ते लोकें गी दान-पुन्न करने सरबंधी कम्में च जुड़ने लेई आखेआ।

<><><><><><>

Shab-e-Qadr Greetings

उपराज्यपाल मनोज सिन्हा- मुख्मंत्रि उमर अब्दुल्ला- उपमुख्मंत्रि ते होरनें दुए काबिना मंत्रियें जम्मू-कश्मीर दे लोकें गी “शब-ए-कदर” दे पवित्र मौके पर मुबारकबाद दिती ऐ। अपने सनेह च इनें आखेआ जे इस पवित्र रात दी मुस्लिम समुदाय लेई बडी पवित्र ते धार्मिक मान्यता ऐ। इनें सबभनें लोकें दी शांति- खुशहारी ते भलाई-बेहतरी दी कामना कीती।

<><><><><><>

SMVDU-Navratras

चैत्र नराते शुरु गै होने आहले न- नरातें दे मद्देनजर श्री माता वैष्णो देवी श्राईन बोर्ड नै श्रद्धालुएं दी आमद दे चलदे त्यारियां तेज करी दिती दियां ना। तांजे श्रद्धालुएं दी यात्रा सुचारु ते रमानदारी आहली होई सकै। श्री माता वैष्णो देवी श्राईन बोर्ड दे अध्यक्ष हुंदी हिदायतें मुजब मुख् कारजकारी अधिकारी होरें इक बैठक लाई ते सुरक्षा- आपदा प्रबंधन ते श्रद्धालुएं दे रश गी दिक्खदे होई सरबंधी त्यारियें दा जायजा लैता। बोर्ड नै श्रद्धालुएं दी सुविधा लेई नेकां इंतजाम कीते दे'न। नरातें 19 मार्च थवां शुरु होआ'रदे न।

<><><><><><>